

ಆದ್ಯತೆ ಮೂರ್ಚನೆ

೨೫

ವಿಲ್ದಾನವು :

ಶ್ರೀಮತಿ ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

ಸಮಿತಿ ಸದಸ್ಯಂಗ

ಅಧ್ಯಕ್ಷ :

ಐಮುಡಿಯಂಡ ರಾಣಿ ಮಾಚಯ್ಯ

ರಿಜಿಸ್ಟ್ರಾರ್ :

ವಿನೋದ್ ಚಂದ್ರ

ಸದಸ್ಯಂಗ :

ಚಿಲ್ಲ ಜಮ್ಮನ ನಾಣಮ್ಮಯ್ಯ ಸೋಮೇಶ್

ಬಾಚರಣಿಯಂಡ ರಾಣು ಅಪ್ಪಣ್ಣ

ಕೊರಕುಟ್ಟಿರ ಸರ ಚಂಗಪ್ಪ

ಕಾಳಚಂಡ ಎ. ಪಳಂಗಪ್ಪ

ಪೊನ್ನೀರ ಪ್ರಭು ಕಾವೇರಪ್ಪ

ಮಂಡೇಪಂಡ ಗೀತಾ ಮಂದಣ್ಣ

ವದಪಡ ಅಯ್ಯಪ್ಪ

ಮಡೆಯಂಡ ವಿಠಲ್ ಚೆಳ್ಳಪ್ಪ

ಪಡಿಂಗಳಾರಂಡ ಎ. ಪ್ರಭುಕುಮಾರ್

ತೇಲಪಂಡ ಕವನ್ ಕಾರ್ಯಪ್ಪ

ಮಡೆಯಂಡ ಸಬಿತಾ ಕಾರ್ಯಪ್ಪ

ಬೀನಂಡ ಎಸ್. ಪೂಣಚ್ಚ

ಆದ್ಯತ ಮೂರ್ಚಿ

ಎಳ್ಳೆನವು :

ಶ್ರೀಮತಿ ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

"Adyatha Mott"

A Collection of Kodava Poems written by Smt. Badkadammanda Kasthoori Govindmayya, New Extension, Madikeri, Kodagu. Published by The Karnataka Kodava Sahithya Academy, Madikeri

ಆದ್ಯ ಮುದ್ರಣ : 2011

ಪ್ರತಿ : 500

© ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್.

ಪ್ರಕಟ ಪಡಾತನವು :

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಕ್ರಯ : 40 ಉರಾಪಿಯ

ಪುಸ್ತಕ ಕೊಟ್ಟವ ಜಾಗ:

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,

ಮ್ಯಾನ್ಸ ಕಾಂಪೌಂಡ್, ಮಡಿಕೇರಿ - 571 201

ಫೋನ್ : 08272 - 229074

ಅಚ್ಚೆಕಾರ :

ಶ್ರೀ ಕೃಷ್ಣ ಕಂಪ್ಯೂಟರ್ಸ್ ಅಂಡ್ ಪ್ರಿಂಟರ್ಸ್

ಪೂಜಾ ಆರ್ಕೆಡ್,

ಜೂನಿಯರ್ ಕಾಲೇಜ್ ರೋಡ್, ಮಡಿಕೇರಿ

ಫೋನ್ : 08272 - 224919, 94481 35592

ಅಧ್ಯಕ್ಷರೊಡ ತಕ್ಕೊ

ಕೊಡವ ಸಾಹಿತ್ಯ ಬೊಳಚೆರ ಬಟ್ಟೆಲುಂಡ್. ಇಂಞಚ್ಚಕೂ ಬೊಳತುವದೇ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಗುರಿ, ಉದ್ದೇಶ.

ಕವಿ, ಕವಯತ್ರಿಯ ಇರ್ ಪೊಲಣೆ ಸೃಷ್ಟಿ ಆಪವು ಅಲ್ಲ. ಕಲ್ಪನಾ ಲೋಕತ್‌ಲ್ ತೆಲಿಯುಂಡ್ ಬಾಳೋಡೀ ಪುರ್‌ಡೂ ಪ್ರಯತ್ನೊ ಇಂಜಕ ಮಾತ್ರ ಕವನ ಸೃಷ್ಟಿಯಾಪ.

ಕೊಡವ ಭಾಷೆಲ್ ಕವನ ಸಾಹಿತ್ಯತಾರ ಬೊಳಚೆ ಕಮ್ಮಿಂಡೆ ಎಣ್ಣಲು. ಕವಿಯಾಂಡಿಕ್ ಪ್ರಯತ್ನತಾರ ಕೂಟಾಕ್ ಸಂಸ್ಕಾರವೂ ಬೊಂಡು. ಶ್ರೀಮತಿ ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ ಅಯಿಂಗಡ ಅಧ್ಯತೆ ಮೊಟ್ಟಾ ಕವನ ಸಂಗ್ರಹ ಕೊಡವ ಸಾಹಿತ್ಯ ಕ್ಷೇತ್ರಕ್ ಓರ್ ಕೊಡುಗೆ.

ಚೆರಿಯ ಮಕ್ಕಳ ದೃಷ್ಟಿಲ್ ಬೆಚ್ಚಂಡ್ ಎಳೊದೊನ ಕವನ ಸಂಗ್ರಹ ಇದ್. ಇಂಞಚ್ಚಕೂ ಕವನ ಇಯಂಗಡ ಕವಿಮನತ್‌ಂಜಿ ಪೊರ ಬೂವಡೊಂದ್ ಬಯಂದವಿ.

ಮಡಿಕೇರಿ

20-2-2011

ಐಮುಡಿಯಂಡ ರಾಣಿ ಮಾಚಯ್ಯ

ಅಧ್ಯಕ್ಷ

ಎಳ್ಳಾ ಕರ್ತೀರ ತಕ್ಕಾ

ಇದ್ ನಾಡ ಮೂಂದನೆ ಪುಸ್ತಕ. ಕವನ, ಕಥೆ, ವೈಚಾರಿಕ ಎಳ್ಳಾ ಇನ್ನತಾನ ಎಳ್ಳಾದ್ವಾತ್ ಆಸಕ್ತಿ ನಾಕ್. ನಾನ್ ಹೈಸ್ಕೂಲ್‌ಲಾ ಓದಿಯಂಡಿಪ್ಪಕ 'ಪ್ರಜಾಮತ' ಆಚೆ ಪತ್ರಿಕೆಲ್ ಬಂದ ಓರ್ ಎಳ್ಳಾ ಓದಿತಾಪಕ ನಾಡ ಮನತ್ತಾರೊಳಲಿಂಜ ಎಳ್ಳಾದ್ವ ಪುರಾಡ್ ಪುಟ್ಟಿತ ಪೊರಬುದ್ದತ್. ಅಲ್ಲಿಂಜಿ ಚೆನ್ನ ಚೆನ್ನ ಎಳ್ಳಾದ್ವ ಪುರಾಡ್ ಜಾಸ್ತಿ ಆಚಿ.

ಸುಮಾರ್ 50 ಕಾಲತ್ತರ ಬಯ್ ಬದ್‌ಕಾವದ್ ಪೆರ್ತ್ ಕಷ್ಟವಾನ ವಿಚಾರ ಆಯಿತಿಂಜತ್. ಚೆರಿಯ ಬಯತ್ತಾಲೇ ಅಪ್ಪನ ಕಳಂದಂಡ್, ಕಷ್ಟತಾಲೇ ಬೊಳಂದಿತ್ ಬಂದಾನಗುಂಡ್ ಎಳ್ಳಾ ಎಳ್ಳಾದ್ವ ಶಕ್ತಿ ಕುಂದಿ ಪೋಚೀಂದೇ ಎಣ್ಣೊಲು. ಆಚೀಂಗಿ ಪುರಾಡ್ ದುಂಬನ ಮನತ್ತರ ಆಸೆನ ಇಕ್ಕ ನಾನಾ ರೀತಿಲ್ ಬೊಳಿ ಪಡ್‌ತುವಕ್ ಕೈಂಜತ್.

'ಕೊಡಗು ಲೇಖಕರ ಮತ್ತು ಕಲಾವಿದರ ಬಳಗ'ತ್ತರ ಸದಸ್ಯೆ ಆನದು ನಾಕ್ ಎಳ್ಳಾದ್ವ ಪುರಾಡ್ ಜಾಸ್ತಿ ಆಚಿ. ಪಲ ಕವನ, ಕಥೆ, ವೈಚಾರಿಕ ಲೇಖನ ಇನ್ನತ್ತದ್ 'ಶಕ್ತಿ' ಕನ್ನಡ ದಿನಪತ್ರಿಕೆಲ್ ಪ್ರಕಟ ಆಪ ಇಂಜತ್. 'ಬ್ರಹ್ಮಗಿರಿ' ಆಚೆ ಪತ್ರಿಕೆಲೊ ಕೊಡವ ಭಾಷೆರ ಪಲತರ ಕಥೆ, ಕವನ, ವೈಚಾರಿಕ ಎಳ್ಳಾ ಪ್ರಕಟ ಆಯಿತ್. ಆಕಾಶವಾಣಿಲೊ ನಾನ್ ಎಳ್ಳಾನ ಕವನ, ಕೊಡವ ಭಾಷೆರ ನಾಟಕ, ಮಹಿಳಾ ವಿಭಾಗತ್ ವೈಚಾರಿಕ ಲೇಖನ ಪ್ರಸಾರ ಆಯಿತ್. ದೂರದರ್ಶನತ್ ಕೂಡ ಕವನ ಪ್ರಸಾರ ಆಯಿತ್. ದಸರಾ ಕವಿಗೋಷ್ಠಿಲ್ ಸುಮಾರ್ ಕಾಲತಿಂಜ ಕವನ ಎಳ್ಳಾದಿತ್ ಭಾಗವಹಿಸಿತುಳ್ಳ.

2006 ನೇ ಇಸವಿಲ್ ನಾನ್ ಕೊಡವ ಭಾಷೆಲ್ ಎಲ್ದಾನ್ 'ಅವ್ವನ ತುದ್‌ಚಿತ್' ಎಣ್ಣುವ ಕವನ ಸಂಕಲನ ಪುಸ್ತಕ ರೂಪತ್ ಬೊಳಿಕಂಡಿತ್. 2010 ನೇ ಇಸವಿಲ್ ಕನ್ನಡ ಭಾಷೆಲ್ ಎಲ್ದಾನ್ 'ಮೊದಲ ಹೆಜ್ಜೆ' ಎಣ್ಣುವ ಕವನ ಸಂಕಲನ ಬೊಳಿಕಂಡಿತ್.

ಕೊಡವ ಭಾಷೆಲ್ ನಾನ್ ಎಲ್ದಾನ್ 'ಅವ್ವನ ತುದ್‌ಚಿತ್' ಕವನ ಸಂಕಲನಕ್ 2010 ನೇ ಇಸವಿಲ್ ಕೊಡವ ಸಾಹಿತ್ಯ ಅಕಾಡೆಮಿಂ ಇ ಪ್ರಶಸ್ತಿ ಕೊಟ್ಟಿತ್. ಅಲ್ಲತೆ, ಕನ್ನಡ ಭಾಷೆಲ್ ನಾನ್ ಎಲ್ದಾನ್ 'ಮೊದಲ ಹೆಜ್ಜೆ' ಕವನ ಸಂಕಲನಕ್ 'ಗೌರಮ್ಮ ದತ್ತಿನಿಧಿ' ಪುರಸ್ಕಾರವೂ ಬಂದಿತ್.

ಇದ್ ನಾಡ ಮೂಂದನೇ ಪುಸ್ತಕ. 'ಆದ್ಯತೆ ಮೊಟ್ಟೆ' ಎಣ್ಣುವ ಈ ಕವನ ಸಂಕಲನತ್‌ನ ಬೊಳಿಪಡ್‌ತಿಯಂಡುಳ್ಳ 'ಕೊಡವ ಸಾಹಿತ್ಯ ಅಕಾಡೆಮಿ'ರ ಅಧ್ಯಕ್ಷ ಶ್ರೀಮತಿ ಐಮುಡಿಯಂಡ ರಾಣಿ ಮಾಚಯ್ಯ ಪಿಂ ಇ ಸಮಿತಿಕಾರಕೂ, ಪ್ರತ್ಯಕ್ಷ, ಪರೋಕ್ಷವಾಯಿತ್ ಸಹಕಾರ ಮಾಡ್‌ನ ಎಲ್ಲಾರ್‌ಕೂ, ಈ ಪುಸ್ತಕತ್‌ನ ಎಡ್‌ತಿತ್ ಓದುವ ಅಭಿಮಾನಿಯಕೂ ನಾಡ ಮನದುಂಬ್‌ನ ನಮಸ್ಕಾರ.

ಮಡಿಕೇರಿ

20-2-2011

ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ

ಒಳ್ಳೆಪಾಳೆಲ್

1. ದೇವಡ ಲೀಲೆ.
2. ಅಜ್ಜಂಡ ಮನೆ
3. ಕೋಡಂಡ ನ್ಯಾಯ
4. ನಂಗಡ ನಾಡ್
5. ಚೋತ ಕುರ್ಕ
6. ಕಾಕೆ - ಕೋಗಿಲೆ
7. ಆನೆಕುಟ್ಟಿ
8. ಗಡಿಯಾರ
9. ಕುರ್ಕಂಡ ಚದಿ
10. ಕೋಟೆಲುಳ್ಳ ಆನೆಯ
11. 10ಲಿಂಜಿ 100, 1 ಲಿಂಜಿ 10
12. ಅವ್ವಂಡ ಪಡಿಪ್
13. ನಾಳೆ ಪಾಳೆ
14. ನಾ ನಟ್ಟ ತೆಂಗೆ ಗಿಡ
15. ಚಂದಮಾಮ
16. ತಾವರೆ ಪೂ
17. ಗಾಳಿಪಟ
18. ತಾಯವ್ವಂಡ ತೇಚ್‌ಕುಳಿ
19. ಬದ್‌ಕಾನ ಚಂದ್ರ
20. ಕಾತ್
21. ಮೊನತಾರೋ ಅಮೆಡೋ ಓಟಾರ ಪಂಥ
22. ಅಜ್ಜ ಮಾಡ್‌ನ ಕೆಣಿ
23. ಮಿನ್ನಂ ಪುಳು
24. ಮಡಿಕೇರಿ ದಸರಾ
25. ಸ್ವರಾಕ್ಷರತ್ ಅಡಂಗ್‌ನ ಆನೆಕುಟ್ಟಿ

ದೇವಡ ಲೀಲೆ

ಮರಗಿಡ ಬಳ್ಳಿಕ್ ಪಚ್ಚೆರಂಗ್‌ನ

ದಾರ್‌ಕೊಡ್‌ತತ್ ಎಣ್ಣೆಮ್ಮಾ?

ಚಿಲಿಪಿಲಿಂದೆಣ್ಣುವ ಪಕ್ಷಿರ ತೊಂಡೆಕ್

ರಾಗ ಕೊಡ್‌ತತ್ ದಾರಮ್ಮಾ?

ಬಾಣತ್‌ಲುಳ್ಳ ಚಂದ್ರಂಡ ಕೂಡ

ಒಳ್‌ಚಿ ಕಳಿಪದ್ ದಾರಮ್ಮಾ?

ಪಳ ಪಳ ಮಿನ್ನುವ ಮಿನ್ನುಂಪುಳುನ

ಬಾಣತ್ ಬೆಚ್ಚೆದ್ ದಾರಮ್ಮಾ?

ಗುಡು ಗುಡುಂದೆಣ್ಣಿ ಸದ್ ಮಾಡಿತ್

ಮಳೆ ತುಳಿ ಇಡ್‌ವದ್ ದಾರಮ್ಮಾ?

ಬಾಣಂದೆಣ್ಣುವ ಕೊಡೆನ ಬುಡ್‌ತಿತ್

ಮಳೆಕ್ ಪುಡಿಪದ್ ದಾರಮ್ಮಾ?

ನವಿಲ್‌ಡ ರೆಕ್ಕೆಕ್ ತರತರ ರಂಗ್‌ಡ

ಕಣ್ಣೆನ ಕೊಡ್‌ತದ್ ದಾರಮ್ಮಾ?

ಪಚ್ಚೆರಂಗ್‌ಡ ಕೊದಿ ಗಿಣಿ ಪಕ್ಷಿಕ್

ಚೋಂದ ಕೊಕ್ ಕೊಡ್‌ತದ್ ದಾರಮ್ಮಾ?

ಮೊಗ್ಗರ ಒಳ್‌ಲ್ ಗಮಗಮ ವಾಸನೆ

ದುಂಬಿತ್ ಬೆಚ್ಚೆದ್ ದಾರಮ್ಮಾ?

ಪೂವ್‌ಂಚಿ ತೇನ್‌ನ ಕುಡಿಪಕ್ ದುಂಬಿಕ್
 ಎಣ್ಣೆತ್ ಕೊಡ್‌ತದ್ ದಾರಮ್ಮಾ?
 ಚಿವ್ ಚಿವ್‌ಂದೆಣ್ಣುವ ಕೊರಿಯಂಡ ಬೆನ್ನಕ್
 ಗೆರನಾ ಬಲ್‌ಚದ್ ದಾರಮ್ಮಾ?
 ಕೊಕ್ಕರೇ ಕೋಂದೆಣ್ಣುವ ತೈರಂಡ ಮಂಡೆಲ್
 ಪೂವ್‌ನ ಬೆಚ್ಚದ್ ದಾರಮ್ಮಾ?
 ಕಡಿಪಳ ಉರ್‌ಪಾಕ್ ಸಾಲಾಯಿ ಪೋಪ
 ಬುದ್ಧಿ ಎಣ್ಣೊನದ್ ದಾರಮ್ಮಾ?
 ಎರಿದುಂಬಾ ತೇನ್‌ನ ಕೂಡಿತ್ ಬೆಕ್ಕಂಡು
 ದೆಣ್ಣೆತ್ ಕೊಡ್‌ತದ್ ದಾರಮ್ಮಾ?
 ಕಣ್ಣ್‌ಕ್ ಕಾಂಗತ ದೇವಳೇ ಇದಾನಾ
 ಮಾಡಿತ್ ನಂಗಕ್ ಬದ್‌ಕ್‌ವಕ್,
 ದೇವಳ ನಂಬಿತ್, ತೊತ್ತಂಡ್ ಎಕ್ಕಲೂ
 ಬದ್‌ಕ್‌ನ ನೀಸಂಡು ನಂಗೆಲ್ಲಾ.



ಅಜ್ಜಂಡ ಮನೆ

ಅಜ್ಜನು ತಾಯಿಯು ದಂದಾಳು ಬೋಂಡು
ಚಿಮ್ಮಿ ಮಕ್ಕಕ್ ಎಕ್ಕಾಲೂ,
ಜೊತಲ್ ಕೂಡಿಯಂಡ್ ತೆಳಿ ತೆಳಿ ಬದ್‌ಕ್ಕಕ
ಬದ್‌ಕ್‌ಲ್ ಕೊಟ್ಟಾವ ಆನಂದ|

ಅಜ್ಜಂಡ ಮನೆರ ಟಾಮಿ ನಾಯಿ
ಬಾ ಬಾಂದೆಣ್ಣೆತ್ ಬೊಗಳ್‌ವಾ,
ಒಲೆಕಟ್ಟೆ ಬರಿಲ್ ವರಕೊಡ ಪೂಂಞಿ
ಮ್ಯಾಂ ಮ್ಯಾಂ ದೆಣ್ಣೆತ್ ಕಾಕ್‌ವಾ|

ಕೊಟ್ಟೆಲುಳ್ಳ ಚೋಮಕ ಪೈಯು
ಅಂಬಾ ಅಂಬಾಂದ್ ಅರಂದಂಡ್,
ಕುಡಿಪಕ್ ಪಾಲ್, ತಿಂಬಕ್ ನೆಯ್ಯು
ಎಕ್ಕಾಲೂ ನಂಗಕ್ ತಂದಂಡ್|

ಕತೆಯೂ ಪಾಟೂ ದಂಡೂ ಎಕ್ಕಾಲೂ
ಅಜ್ಜನು ತಾಯಿಯು ಎಣ್ಣೆತ್,
ಓದ್‌ವಕ್ ಪುಸ್ತಕ, ಎಳೊದ್ವಕ್ ಸ್ಲೇಟ್
ಪೆಟೆಂಜಿ ಕೊಂಡ್‌ಬಂದೀತ್

ಮೊರಡ್ಡಕ ಮಕ್ಕಕ್ ಪೆಪ್ಪರಾಮೆಂಟ್
 ಡಬ್ಬಿಂಜಿ ಎಡ್‌ತಿತ್ ತಂದೀತ್,
 ಮುಳ್ಳಾ ಒಟ್ಟಿ, ಚಿಮ್ಮಿ ದೋಸೆ
 ತಾಯವ್ವ ಮಾಡಿತ್ ತಂದೀತ್||

ಕೊದಿ ಮೊದ ಎಲ್ಲಾ ಕಾರ್‌ಮಕ್ಕಕ್‌ಂದೆಣ್ಣಿ
 ಕರಕರೆ ಮಾಡಿತ್ ಚಾಕ್‌ವ,
 ರಜತಾನ ಮಜತಲ್ ಕೈಯಿಪಕ್ ಎಕ್ಕಲೂ
 ಅಜ್ಜಂಡ ಮನೆ ನಂಗಕ್ ಇಕ್ಕಂಡು.



ಕೋಡಂಡ ನ್ಯಾಯ

ಪೂಂಞಿಯ ದಂಡ್ ಕೂಡಿಯಂಡ್
ಬೊಣ್ಣೆ ನೆಯಿ ಕಟ್ಟುತ್|
ಸರಿಸಮ ಪಾಲಕಾಯಿ
ತಕ್ಕಡಿಲ್ ಇಟ್ಟುತ್|

ನಾಕ್ ಕಮ್ಮಿ, ನೀಕ್ ಎರಂದೆಣ್ಣಿ
ಬಲ್ಚಿ ಕಳಿ ಕಳಚತ್|
ಕೂತ್ ಕಿರ್ಚಲ್, ಬಲ್ಚಿಕಳಿಯು
ಜೋರ್ ಜೋರ್ಲಾಪಕ|

ಕೋಡನೊಂದ್ ಇದೊನಕಂಡ್
ಮರತ್ಲಳತಿತಿಂಜತ್|
ಸದ್ ಕೇಟ ಮನಸ್ಸೊಳಲೆ
ಕುಸಿಲ್ ಗೇನ ಮಾಡ್ಚಿ|

ಮೆಲ್ಲೆ ಇಳಂಚಿ ಪಕ್ಕಬಂದ್
ನೋಣೆಲ್ ತಕ್ಕ ಪರಂದತ್|
ನ್ಯಾಯತ್ತಲ್ ನೆಯಿನ ನಾನಾ
ಪಾಲ್ ಮಾಡಿ ತಪ್ಪಿಲಂದ್|

ತಕ್ಕ ಕೇಟ ಪೂಂಞಿ ದಂಡೂ
ಒತ್ತಿತ್ತಿನ್ನನೆ ಎಣ್ಣೆ ಚಿ|
'ನ್ಯಾಯ ನೀತಿ ರೀತಿಲ್
ಸಮಾ ಪಾಲ್ ಮಾಡಂಡು|

ತಕ್ಕಾಡಿ ಎಡ್ಡೆತ್ ಕೈಲ್ ಪುಡ್ಚಿ
 ಪಾಲ್ ಸುರು ಮಾಡ್ಚಿ|
 ಚೆನ್ನ ಜಾಸ್ತಿ ಆನ ತಟ್ಟೆ
 ಕೋದಕ್ ತೂಂಗ್ವದು|

ಚೆನ್ನ ನೆಯಿ ಅದ್ಂಜಿ ಎಡ್ಡೆತ್
 ಬಾಯಿಲ್ಟ್ ಮುಗ್ಚಿ|
 ಅದ್ಂಜಿ ಚೆನ್ನ ಇದ್ಂಜಿ ಚೆನ್ನ
 ಎಡ್ಡೆತ್, ಎಡ್ಡೆತ್ ಮುಗ್ಚಿ|

ದುಂಬಾ ಇಂಜ ಬೊಣ್ಣೆನೆಯಿ
 ಚೆನ್ನಂಗಾಯಿ ಕಾಂಬದು,
 ನೋಟಿಯಂಡಿಂಜ ಪೂಂಇದಂಡು
 ಪಕ್ಕ ಬಂದ್ ನಿಂದತ್|

ಅಣ್ಣಾ, ಅಣ್ಣಾ ಬೊಣ್ಣೆ ಮುದ್ದೆ
 ಚೆನ್ನಂಗಾಯಿ ಕಾಂಬಲಾ|
 ತಕ್ಕ ಕೆಟ ಕೋಡಕುಟ್ಟಿ
 ಮನಸ್ಸಲೇ ತೆಳಚಂಡ್|

ಬೊತ್ತತ್ತಿನಿಂಗ ನ್ಯಾಯತೋಡೆ
 ಪಾಲ್ವಾಡಿ ತಪ್ಪಿಂದ್|
 ತಟ್ಟಲಿಂಜ ನೆಯಿನ ಎಡ್ಡೆತ್
 ಬಾಯಿಲ್ಟ್ ಮುಗ್ಚಿ|

ರಭಸತೋಡೇ ಮರಕ್ ಪಾರಿ
 ರಸತೋಡೇ ಎಣ್ಣೆ ಚಿ|
 ನಿಂಗಡ ಜಗಳ ಇಂದ್ ನಾಕ್
 ಲಾಭಕ್ ಬಟ್ಟೆ ಆಚಿಲಂದ್||

ನಂಗಡ ನಾಡ್

ಅವ್ವ ತಕ್ಕ ಕೊಡವ ತಕ್ಕ
ಕೊಡಗ್ ಭೂಮಿ ನಂಗಡಾ|
ಬೋಜತೋಡೇ ಬದ್ಕಿ ಬಾವ
ಕೊಡಗ್ ಭೂಮಿ ನಂಗಡಾ|

ತೇಗ, ಬೂಟಿ, ಚಾಂದ್ ಮರವು
ದುಂಬಿತುಳ್ಳ ನಾಡಿದ್|
ಪಣ್ಣ್ ಪಲ, ಕಾಡ್ಕಳ್ಳಂಜಿ
ತಿಂದ್ ಬದ್ಕ ನಾಡಿದ್||೧||

ಕುಂದ್-ಮೊಟ್ಟೆ ಪಚ್ಚೆರಂಗ್
ಸುತ್ತ ಉಳ್ಳ ನಾಡಿದ್|
ಕಾಫಿ, ಪುಳಿ, ನಲ್ಲಮಳು
ಬೊಳತಿ ಬದ್ಕ ನಾಡಿದ್||೨||

ಕೇಳಿ ಪೋನ ಪಡೆಕಾರ
ಪುಟ್ಟಿ ಬೊಳಂದ ನಾಡಿದ್|
ಪಡೆಕ್ ಪೋಪ ಬೀರ್ಯತುಳ್ಳ
ಬೈಂಬಂಗಡ ನಾಡಿದ್|

ಚಾಯಿಕಾರ್ತಿ ಮೂಡಿ ಕುಂಞಿಯ
 ಓಡಿಕಳಿಪ ನಾಡಿದ್
 ಕೆಳಿಪೋನ ಬಾಲಕಾರ
 ದುಂಬಿತುಳ್ಳ ನಾಡಿದ್

ಬೆಂದು ಚಾಚೆ, ಚಂಜಾದಿಯ
 ಕೂಡಿ ಬಾವ ನಾಡಿದ್
 ನೆಮ್ಮದಿಕೂ ಸೌಖ್ಯಕೆಂದೂ
 ಕೊರು ಇಲ್ಲತ ನಾಡಿದ್

ಕಾವೇರಮ್ಮ ಪುಟ್ಟಿಬಂದ್
 ಪಾಪ ಕತ್ತ ನಾಡಿದ್
 ನಯಿಚಿ ಬದ್ಕ ಜನತ್‌ನೆಲ್ಲ
 ಚಾಕಿ ಪೊಲತ್ತ ನಾಡಿದ್



ಚೋಲಿತ ಕುರಾಕ

ಚಪ್ಪರ ದುಂಬಾ
ಜೊಪ್ಪೆ ಜೊಪ್ಪೆ
ದ್ರಾಕ್ಷೆ ತೂಂಗಿಯಂಡಿಂಜತ್|

ತೂಂಗಿಯಂಡಿಂಜ
ಜೊಪ್ಪೆನ ಕಾಂಬಕ
ಕುರಾಕಂಗ್ ತಿಂಬಕ್ ಆಸೆ ಆಚಿ|

ದ್ರಾಕ್ಷೆ ತಿಂಬ
ಆಸೆಯು ಪೆರ್ತದ್
ಪೊರಟತ್ ಮೆಲ್ಲೆ ತೋಟಕ್|

ಬೇಲಿ ಪಾರಾಚಿ
ಒಳಾಕ್ ನುಗ್ಗಿಚಿ
ದ್ರಾಕ್ಷೆಡ ಜೊಪ್ಪೆನ ನೋಟಾಚಿ|

ಚಪ್ಪರ ದುಂಬಾ
ಎತ್ತರತಿಂಜತ್
ಕುರಾಕಂಡ ಬಾಯಿಕ್ ಕ್ಕೊಟ್ಟಲೆ|

ಪಾರ್ಚಿ, ಪಾರ್ಚಿ

ಎತ್ತರ ಪಾರ್ಚಿ

ದ್ರಾಕ್ಷೆ ಬಾಯಿಕ್ ಕೊಟ್ಟೆಲೆ|

ಇಂಞೂ ಎತ್ತರ

ಇಂಞೂ ಎತ್ತರ

ಪಾರ್ಚಿ ಪಾರ್ಚಿ ಎತ್ತರಕ್|

ದ್ರಾಕ್ಷೆ ಕೊಟ್ಟೆ

ಕೈಯತೆ ಆಪಡು

ದುಃಖತೆ ಎಣ್ಣೆಚಿ ಇನ್ನನೆ|

ದ್ರಾಕ್ಷೆ ಬೋಂಡ

ಪುಳಿ, ಪುಳಿ ದ್ರಾಕ್ಷೆ

ನಾಕ್ ಬೋಂಡ ಈ ದ್ರಾಕ್ಷೆ|

ಪುಳಿ, ಪುಳಿ ದ್ರಾಕ್ಷೆ

ಪುಳಿ ಪುಳಿ ದ್ರಾಕ್ಷೆ

ತೂಂಗಿಯಂಡೇ ಇರ್ ಚಪ್ಪರತೆ|



ಕಾಕೆ - ಕೋಗಿಲೆ

ಕರ್ತ ರಂಗ್‌ಡ ಕಾಕೆ ಎಕ್ಕಲೂ
ಕಾ... ಕಾಂದ್ ಎಣ್ಣುವ|
ಕರ್ತರಂಗ್‌ಡ ಕೋಗಿಲೆ ಎಕ್ಕಲೂ
ಕುಹೂ... ಕುಹೂಂದ್ ಎಣ್ಣುವ||

ರಂಗ್-ರೂಪ್ ಒರೇ ತರ
ಗುಣತ್ ಕಾಂಗೂ ವ್ಯತ್ಯಾಸ|
ದಂಡೂ ಕೂಡ ಪಕ್ಷಿಯಳಾಯಿತು
ಬದ್‌ಕ್ ಮಾತ್ರ ವಿಚಿತ್ರ||

ಕಾಕೆ ಕೆಟ್ಟನ ಗೂಡ್ ನುಗ್ಗಿ
ಮೊಟ್ಟೆ ಇಡ್‌ವ ಕೋಗಿಲೆ|
ಕಾಕೆ ಅದ್‌ಂಗ್ ಕಾವ್ ಕೊಡ್‌ತ್
ಕುಂಞಿಯ ಮಾಡಿತ್ ಚಾಕ್‌ವ||

ತಾಂಡ ಕುಂಞಿಯಡ ಕೂಡೇ ಅದ್‌ನೋ
ನಂದಾಯಿ ಚಾಕ್‌ವ|
ಒರೇ ಗೂಡ್‌ಲ್ ಬೊಳೆವ ದಂಡೂ
ನೆಮ್ಮದಿಲೇ ಬದ್‌ಕ್‌ವ||

ರಾಗತೋಡೆ ಪಾಡಿ ಕೋಗಿಲೆ
 ಮೆಚ್ಚುಗೆನಾ ಪಡ್ಂದವ,
 ಹೊಲಸು ತಿಂಬ ಕಾಕೆ ಎಕ್ಕಲೂ
 ಬೈಗಳವೇ ಕೆಟ್ಟಿಯವ||

ರಂಗ್-ರೂಪ ಒಂದೇ ಆಚೇಂಗೂ
 ಗುಣತ್ ಕಾಂಗೂ ವ್ಯತ್ಯಾಸ|
 ರೂಪ ಕೊದೊಚಿ ಗುಣ ಅರಿಯತೆ
 ಮೋಸ ಪೋಪಕಾಗಲಾ||

ಗುಣ-ರೂಪ ದಂಡೂ ಅರ್ಂಜಿ
 ಯೋಗ್ಯತೆನಾ ಅಳಕಂಡು|
 ರೂಪಕೊಂಜಿ ಗುಣವೇ ಮೇಲ್
 ಎಣ್ಣುವ ಸತ್ಯ ಅರಿಯಂಡು||



ಆನೆ ಕುಟ್ಟಿ

ಕಾಡ್‌ರೊಳ್‌ಂಜಿ ಆನೆಕುಟ್ಟಿ
ಓಡಿಯಂಡ್ ಬಾತ್
ಬಲ್ಯ ಪರ್‌ಂಬ್ ಕಂಡ್ ಅದ್
ಮೆಲ್ಲೆ ನಿಂದ್ ನೋಟೊಚಿ||

ಕಳೊಚೆಂಡಿಂಜ ಚಿಮ್ಮಿ ಮಕ್ಕ
ಕುಟ್ಟಿ ಆನೆನ ಕಂಡಿತ್
ಬೊತ್ತಿ ಬೊರಂಡಿ ನೋಟಿಯಂಡ್
ಮನಕ್ ಓಟೊ ಮುರ್‌ಕೊಚಿ||

ಚೆರಿಯ ಕಣ್ಣ್ ಅಗಲ ಮಾಡಿ
ಮಕ್ಕಳೆಲ್ಲಾ ನೋಟೊಚಿ
ತುಂಬಿಕ್ಕೆ ನೇತಿ ಮೆಲ್ಲೆ
ಮಕ್ಕಳೆಲ್ಲಾ ಕಾಕೊಚಿ||

ಪಕ್ಕ ಬಾರಿ ನಿಂಗ ಎಲ್ಲಾ
ಕೂಡಿ ಆಡಿ ಕಳಿಕನಾ|
ಬೊತ್ತಿ ಬೊರಂಡಿ ಓಡಿಯಂಡಿಂಜ
ಮಕ್ಕ ನಿಂದ್ ನೋಟೊಚಿ||
ಮೆಲ್ಲೆ ಮೆಲ್ಲೆ ನಿಂದ್ ಕಳೊಚಿ
ದೂರತಿಂಜ ನೋಟೊಚಿ||

ಅಗಲ ಕೆಮಿ, ಚೆರಿಯ ಕಣ್ಣ್
 ತುಂಬಿಕೈನ ಕಾಂಬದು
 ಮರತ್‌ರಂತ ಕಾಲ್ ಕಂಡ್
 ಕೂತ್ ಕೊಡ್‌ತ್ ಓಡ್‌ಚಿ||

ಬೆವರ್ ಉಕ್ಕಿ, ಮೇಲ್ ಬೊರತ್
 ಕಣ್ಣೆ ಕಾಂಗತಾಪದು
 ಪುಯ್ಯಲ್‌ಟ್ವ, ಎದ್ದ್ ಬುದ್ದ್
 ಪಾರಿ ಮನೆಕ್ ಎತ್‌ಚಿ||

ಅಯ್ಯೋ ಅವ್ವಾ! ಆನೆಕುಟ್ಟಿ
 ಬಯ್ಯ ಓಡಿ ಬಾತ್‌ಂದ್
 ತಬ್ಬಿ ಪುಡ್‌ಚಿ, ಕೂತ್‌ಕೊಡ್‌ತ್
 ರಂಪ ಮಾಡಿ ಎಣ್ಣೆ ಚಿ||

ಬೊತ್ತಿ ಪೋನ, ಅವ್ವ, ಕಿರ್‌ಚಿ
 ಕುಂಞಿ... ಕುಂಞಿಂಂದ್ ಕಾಕ್‌ಚಿ
 ಕಣ್ಣ್ ತೊರಂದ್ ನೋಟಣೆಕ್
 ಅವ್ವ... ತಬ್ಬಿಯಂಡಿಂಜತ್||



ಗಡಿಯಾರ

ಟಿಕ್... ಟಿಕ್... ಗಡಿಯಾರ

ಆತುರಪಟ್ಟೆಂಡ್ ಓಡ್ವೊ ಎನ್ನಂಗ್?

ಸಮಯ ಪೆರ್ತ್ ಬೆಲೆ ಉಳ್ಳದ್ದೆಂದೆಣ್ಣುವ

ತಕ್ಕನ ನಾನ್ ಅರ್ಂಜಿತ್ ಉಳ್ಳಾಂಗ್.

ಸಮಯತ್‌ನೆಕ್ಕಲು ಮುಂಡತೆ, ಮುಂಡತೆ

ಕಳೆವಕ್ ಆಗಾಂದ್|

ಟಿಕ್... ಟಿಕ್... ಸದ್ದ್ ಮಾಡಿತ್ ಎಲ್ಲಾಕೂ

ಅರಿವಿಕೆ ಕೊಡ್ತಂಡ್|

ನಿಕ್ಕತೆ ಇನ್ನನೆ ಓಡ್ವೆ ನೀಕ್

ಸುಸ್ತೆ ಆಪಾಲೆಯಾ?

ಸುಸ್ತ್ ಎಣ್ಣಿತ್ ನಾನಿಂದ್ ಪೋನಕ

ಆಕು ನಿಂಗಲ್ಲಾ ಸೋಮಾರಿಯ

ಕೆಲಸವು ಮಾಡತೆ, ಬೋಳ್ ಪಂಚಾತಿಕೆ

ನಿಂಗಡ ತೀರತೆ ಇಕ್ಕುಲಾ|

ಟಿಕ್... ಟಿಕ್... ಎಣ್ಣುವ ಸದ್ದೆ ನಾಡ

ಬೀವಂತಿಗೊ ಗುರ್ತ್

ಓಟವೇ ಎಕ್ಕಲೂ ಜೀವಂತಿಗನ
 ಕಾಟಾವ ನಾಡ ರೀತಿಯೆಂದ್|
 ಅರಂಜಿತ್ ನಿಂಗಳು, ಸೋಮಾರಿಯಳಾಕತೆ
 ಬದ್ಕಿತ್ ಚಾಯೋಡ ಬಾಳಿಯೆಂದ್,

ಟಿಕ್... ಟಿಕ್... ಎಣ್ಣಿಯೆಂಡ್ ನಿಂಗಕ್ ನಾನಾ,
 ಎಚ್ಚರ ಎಕ್ಕಲೂ ತಂದೆಂಡ್
 ನಿಂಗಡ ಬದ್ಕಿಡ ಜೊತೆಲ್ ನಾನಾ
 ನಿಕ್ಕತೆ ಎಕ್ಕಲೂ ಓಡಿಯೆಂಡ್

ಪರೋಪಕಾರವೇ ನಾಡ ಬದ್ಕಿಡ
 ಗುರಿಯೆಣ್ಣುವಾನ ಕಾಟಿಯೆಂಡ್|
 ನಿಕ್ಕತೆ ನಾನಾ ಓಡಿಯೆಂಡಿಪ್ಪಿ
 ಎಣ್ಣುವ ಸತ್ಯತನ ಕಾಟಿಯೆಂಡ್|



ಕುರ್ಕಂಡ ಚದಿ

ಮರತಾರ ಮೇಲೆ ಅಳತಂಡ್ ಕಾಕೆ
ಅಪ್ಪರ, ಇಪ್ಪರ ನೋಟೊಚಿ|
ದೂರತಾಲಿಂಜ ಯರ್ಚಿರ ತುಂಡ್
ಕಾಕೆರ ಕಣ್ಣ್ ಕ್ ಬುದ್ಧತ್|

ಪಾರಿ ಪೋಯಿತ್, ಯರ್ಚಿ ಕೊತ್ಯಂಡ್
ಕೊಂಬೆರ ಮೇಲೆ ಅಳತತ್
ದೂರತಾಲಿಂಜ ಕುರ್ಕ ಕಂಡಿತ್
ಆಸೆಲ್ ಬಾತ್ ಮರತಾರಡಿಕ್|

ಕೊಡಿಕ್ ನೋಟಿಯಂಡ್ ಕಾಕೆರ ಕೂಡ
ಪರಂದತ್ ತಕ್ಕ ರಸತೋಡೆ|
'ಅಕ್ಕ... ಅಕ್ಕ... ನೀಡ ರಂಗ್
ಲೋಕತ್ ದಾರ್ಕು ಇಲ್ಲೆಂಡ್|

ನೀಡ ಚಾಯಿ, ಕೊಕ್ಕೊಡ ಬೋಜ
ಕಂಡಿತ್ ನಾಕ್ ಕೊದಿಯಾಚಿ|
ಇಚ್ಚೆಕೆ ಅಲ್ಲಾ ಅಕ್ಕಯ್ಯ, ನೀಡ ಪಾಟ್
ನೀಡ ರಾಗ, ಕೋಗಿಲೆಕೊಂಜಿ ಚಾಯಿಂಡ್|
ರಾಗತೋಡೆ ಓರ್ ಪಾಟ್
ಪಾಡಂಡು ಇಕ್ಕ ನೀನ್‌ಂಡ್|

ಕುರ್ಕಂಡ ತಕ್ಕೂರ ಚದಿನ ಅರಿಯತೆ
 ಕಾಕೆಡ ಮನಸ್ಸು ಪೊಂಜೊಚಿ|
 ಪಾಡ್ವಕಂದೆಣ್ಣಿ ಬಾಯಿ ತೊರಪಕ
 ಯರ್ಚಿರ ತುಂಡ್ ಬುದ್ಧತ್|

ಚುರ್ಕಲ್ ಬಂದಿತ್, ಯರ್ಚಿನ ಕಡೊಚಂಡ್
 ಓಡೊಚಿ ಕುರ್ಕ ಕಾಡೊಕ್|
 ಪಾಟೂ ಬೊಂಡ, ರಾಗವೂ ಬೊಂಡ
 ಒಂದೂ ಬೊಂಡಂದೆಣ್ಣಿತ್|

'ಹೊಗಳಿಕೆ ತಕ್ಕ ಎಕ್ಕಲೂ ನಂಗಳ
 ಕೆಣೊಚಿತ್ ಬೆಪ್ಪ ಬದೊಕ್|
 ಎಣ್ಣುವ ಬುದ್ಧಿರ ತಕ್ಕನ ಅರೊಂಚಿತ್
 ಮರಕತೆ ಬಾಳಂದು ನಂಗೆಲ್ಲಾ.



ಕೋಟೆಲುಳ್ಳ ಆನೆಯ

ಬಪ್ಪ... ಬಪ್ಪ... ಬಪ್ಪ ನಂಗ
ಕೋಟೆ, ಪೇಟೆ ನೋಟ್ಟುಕ್|
ಕೋಟೆರೊಳ್‌ಲಾ ನಿಂದ ದಂಡ್
ಆನೆ ಕುಟ್ಟಿಯಳ ನೋಟ್ಟುಕ್|

ಬಲ್ಯ ಆನೆ, ಚೆರಿಯ ಆನೆ
ದಂಡೂ ನಿಂದ ಚಾಯಿನ
ತೇಂಡಿ, ತೌವುಡಿ, ಮುಟ್ಟಿ ಕೈಯಿಲ್
ಕಣ್ಣ್ ದುಂಬಾ ನೋಟ್ಟುಕ್|

ಚೆರಿಯ ಕಣ್ಣ್, ಅಗಲ ಕೆಮಿಯೂ
ತುಂಬಿಕೈನೋ ಮುಟ್ಟಿತ್
ಕಾಲ್ ತಬ್ಬಿ, ಬಾಲ್ ಪುಡ್‌ಚಿ
'ಆಹಾ.... ಚಾಯಿಂದೆಣ್ಣಿತ್'|

ಕಾಲ್‌ರಡಿಯ ನುಗ್ಗಿ ನುಗ್ಗಿ
ಪುಡಿಪಕಳಿನೋ ಕಳ್‌ಚಿತ್
ನೀಕ್ ಜೀವ ಇಲ್ಲೆಂದೆಣ್ಣಿ
ಕೈಯಿನ ಬಾಯಿರೊಳ್‌ಕ್ ಇಟ್ಟಿತ್|

ಓಹೋ... ಆನೆ, ಎಕ್ಕಲೂ ನೀನ್
 ನಂಗಡ ಕೂಡ ಕಳಚಕ|
 ಅಜ್ಜ್ ಬೆಲ್ಲ, ತೆಗೆ ಪೊಳಿಯು
 ಜಲ್ಲೆ ಕೈಬ್ ತಪ್ಪಿಲಾ|

ಕಲ್ಲಾಗಂಡಿರ ತಿರಾಕೆರೊಳ್ಳಲ್
 ಅಳತಿತುಳ್ಳ ಗಣಪಂಗ್|
 ಕೈ ತೊತ್ತ್, ಕಣ್ಣ್ ಮುಚ್ಚಿ
 ಅಡ್ಡ ಬುದ್ದ್ ಬೋಡ್ಚಿ|

ಪೇಟೆಲುಳ್ಳ ಕೋಟೆ ನೋಟಿ
 ಪೊರಟ್ ಮನೆಕ್ ಬಂದಿತ್
 ಕಣ್ಣ್ ಮುಚ್ಚಿ, ಗೇನ ಮಾಡ್ವಕ
 ಆನೆ ಕುಟ್ಟಿಯ ದಂಡ್ ಕಂಡತ್.



10 ಲಿಂಜಿ 100

ಪತ್ತ್ ಪತ್ತ್ ಇರ್ವದ್	-	ವಯಸ್ಸ್ ನಾಕ್ ಅರ್ವದ್
ಇರ್ವದ್ ಪತ್ತ್ ನುಪ್ಪದ್	-	ನಡು ಬಗ್ಗಿ ನಾಡ ಪೋಪದು
ನುಪ್ಪದ್ ಪತ್ತ್ ನಾಪದ್	-	ನಡ್ ಪಕ್ ಕೈಯತೆ ಆಪದು
ನಾಪದ್ ಪತ್ತ್ ಐಂಬದ್	-	ಕೈಕೋರ್ ತಂಡ್ ಬಪ್ಪದು
ಐಂಬದ್ ಪತ್ತ್ ಅರ್ವದ್	-	ಕೆಮಿಯೂ ಕೇಕತೆ ಆಪದು
ಅರ್ವದ್ ಪತ್ತ್ ಎಳ್ವದ್	-	ಬಾಯಿಲ್ ಪಲ್ಲೆಲ್ಲಾ ಬೂವದು
ಎಳ್ವದ್ ಪತ್ತ್ ಎಂಬದ್	-	ಕಣ್ಣೂ ಕಾಂಗತೆ ಆಪದು
ಎಂಬದ್ ಪತ್ತ್ ತೊಂಬದ್	-	ಬದ್ ಕವ ಆಸೆ ತೇಂದದು
ತೊಂಬದ್ ಪತ್ತ್ ನೂರ್	-	ಸ್ವಾಮಿರ ಪಾದಕ್ ಸೇರ್

ಒಂದ್ ಲಿಂಜಿ ಪತ್ತ್

ಒಂದ್, ದಂಡ್	-	ಕೈಲುಂಡ್ ಚೆಂಡ್
ಮೂಂದ್, ನಾಲ್	-	ಕನ್ನಡಿ ಸಾಲ್
ಅಂಜಿ, ಆರ್	-	ಕನ್ ಚ ನಾ ಜೋರ್
ಏಳ್, ಎಟ್ತ್	-	ಮಂಡೆಕ್ ಕುಟ್ತ್
ಒಯಿಂಬದ್, ಪತ್ತ್	-	ಬೆನ್ನೆಕ್ ಪೋಯಿತ್

ಒಂದ್ ಲಿಂಜಿ ಪತ್ತ್ ಇನ್ನಿನಿಂಜಿತ್

ಚೆಂಡ್ ಕಳಿಯು ತೇಂದತ್

ಅವ್ವಂಡ ಪಡಿಪ್ಪಾ

ಉಂಬಳ ಮನೆರ ಒಲೆ ಕಟ್ಟೆಲ್
 ಇಂಜತ್ ದಂಡ್ ಪೂಂಇತಿ ಕುಟ್ಟಿಯ|
 ಅವ್ವಂಡ ಬಯ್ಯ ಸುತ್ತಿಕಳಚಂಡ್
 ಮೆಲ್ಲೆ ಮೆಲ್ಲೆ ಅರಂದಂಡ್|

ಎಲಿಯಳ ಪುಡಿಪ ಕೆಣಿನ ದಂಡೂ
 ಅಪ್ಪನಗುಂಡ್ ಪಡ್ಚೆತ್|
 ಅಟ್ಟಕ್ ಪತ್ತಿತ್, ಬುಟ್ಟತ ಸಿರೆಲಿಂಜಿ
 ಎಲಿಯಳ ಪುಡ್ಚಿತ್ ತಿಂದತ್|

ಎಲಿಯಳ ಪುಡ್ಚಿತ್, ಕೈಂಜಿ ಬುಟ್ಟಿತ್
 ಮುರಕಿ ಪುಡಿಪಕ್ ಕಾಟಿತ್|
 ಓಡಿ ಪೋಪಕ, ಪಾರಿತ್ ಪುಡಿಪ
 ಕೆಣಿನ ಕುಟ್ಟಿಕ್ ಕಾಟಿತ್ ಕೊಡ್ತತ್|

ಸಿಂಡ್ ಎಡ್ತಂಡ್ ಎಲಿಯಳ ಪುಡ್ಚಿತ್
 ಕೊಲ್ಲುವ ಚಾಲಾನ ಕಾಟಿಯಂಡ್|
 ತಾನೇ ಪುಡ್ಚಿತ್, ಎಲಿಯಳ ಕೊಂದಿತ್
 ಕುಟ್ಟಿಯಕ್ ತಿಂಬಕ್ ಕೊಡ್ತೀತ್|

ಅವ್ವಂಡ ಪಾಠ ಬದ್ಕೆ ಬಟ್ಟೆನ
 ಮಕ್ಕಕ್ ಕಾಟಿ ಕೊಡ್ಪಾಂದ್
 ಎಣ್ಣುವ ತಕ್ಕಡ ಮರ್ಮತ್ನ ಅದ್
 ಮನುಷ್ಯಂಗ್ ಕಾಟಿತ್ ಕೊಡ್ತಂಡ್.

ನಾಳೆ ಪಾಳೆ

ನಾಳೆ, ನಾಳೆ ಎಣ್ಣೆಯೆಂದ್
ಕಾಲ ಕೈಯಿಪಕಾಗಲಾ|
ನಾಳೆಂದೆಣ್ಣುವ ತಕ್ಕ ಎಕ್ಕಲೂ
ಬದ್‌ಕ್ ಪಾಳೆ ಮಾಡುಲಾ|

ನಾಳೆ ಮಾಡ್ ಪಣೆನೆಲ್ಲಾ
ಇಂದೇ ಮಾಡಿ ತೇಕಂಡು|
ಇಂದ್ ಮಾಡಂಡ್ ಪಣೆನೆಲ್ಲಾ
ಇಕ್ಕ ಮಾಡಿ ತೇಕಂಡು|

ಅಂದಕ್ಕವನೆ ಬುದ್ಧಿ ಕಾರ
ಬದ್‌ಕ್ ಬಟ್ಟೆ ಕಂಡಂದ್|
ಬದ್‌ಕ್ ನಂದ್ ಆಯಿತು
ಕೊಟ್ಟು ಅವಂಗ್ ನೆಮ್ಮದಿ|

ಅದ್‌ನಗುಂಡ್ ಕುಂಞಿಯಳೇ|
ನಲ್ಲ ತಕ್ಕ ಪರೆವಿನಾ...|
ನಾಳೆ ಎಣ್ಣೆನವಂಡ ಬದ್‌ಕ್
ಕಾಡೆ ಕೂಡಿ ಪೋಕುಲಾ|

ನಾನೆಟ್ಟು ತೆಂಗೆ ಗಿಡ

ಅಣ್ಣನು ನಾನೂ
ಪಟ್ಟಿರ ಕರಲಾ
ನಟ್ಟಿತ್ ದಂಡ್ ತೆಂಗೆ ಗಿಡ|

ನೀರ್, ಗೊಬ್ಬರ
ಇಟ್ಟಿತ್ ಅದ್‌ಂಗ್
ಚಾಕ್‌ಚಿ ಅದ್‌ನ ಚಾಯೋಡೆ|

ಸೂರ್ಯಂಡ ಬೆದ್‌ಕ್
ಬಾಡತೆ ಇರಡ್‌ಂದ್
ತೊಪ್ಪ್ ಕೊಂಬ್‌ಲ್ ಮುಚ್ಚಿತ್|

ಎಕ್ಕಲೂ ನೋಟಿಯುಂಡ್
ಎಚ್ಚರ ಬೆಚ್ಚುಂಡ್
ಚಾಕ್‌ಚಿ ನಂಗ ಚಾಯೋಡೆ|

ಕಾಲ ಅಂಬಾರ್
ಕೈಯಿಜಿತಾಪಕ
ಎತ್ತರ ಬೊಳಂದತ್ ತೆಂಗೆ ಮರ|

ಜೊಪ್ಪೆ ಜೊಪ್ಪೆ
ತೆಂಗೆ ಪುಡಿಪಕ
ಕುಸಿಪಟ್ಟಿತ್ ನಂಗಲ್ಲಾ|

ಎಳನೀರ್ ಕೆತ್ತಿತ್
ಕುಡ್‌ಚಿತಾಪಕ
ಮನತ್ತಾರ ಆಸೆ ನೀಂಗ್‌ಚಿ|

ಬೊಳಂದ ತೆಂಗೆ
ಆದ್ಯ ಕೊಜ್ಜಿತ್
ಹಣ್ಣ್ ಕಾಯಿ ಒಡತತ್|

ನಂಗಡ ಮರತ್
ತೆಂಗೆ ಕ್ಷೊತ್
ಮನತ್ ದುಂಬ್‌ಚಿ ನೆಮ್ಮದಿ|

ತೆಂಗೆರ ಗರಿಯೂ,
ಒಣಕ್ ಕೈಯೂ
ಗುಡ್ಡತ್ ಒಲೆಕ್ ಕ್ಷೊಚಿ|

ಕಾಲ ಕಾಲಕ್
ತೆಂಗೆ ಪುಡ್‌ಚತ್
ಕ್ಷೊಚಿ ಲಾಭ ನಂಗಕ್|

ಅದ್‌ನಗುಂಡೇ
ತೆಂಗೆ ಮರತ್‌ನ
'ಕಲ್ಪ ವೃಕ್ಷಾಂದ್' ಎಣ್ಣುವ|

ಚಂದಮಾಮ

ಇರ್‌ಟಿತ್ ಬೀಂದ ಪೂವ್‌ನನ್ನಕ್ಕೆ

ತೆಳಿ ತೆಳಿ ತೆಳಾಚಂಡ್‌|

ಕಲಕ್‌ನ ಮೋರ್‌ಲ್ ತೇಲಿಯುಂಡಿಪ್ಪ

ಬೊಣ್ಣೆ ನೆಯಿರನ್ನಕ್ಕೆ|

ಬಾನತ್‌ಲುಳ್ಳ ಮಿನ್ನಂಪುಳಲ್

ನಾನೇ ಬಲ್ಯದ್‌ಂದೆಣ್ಣಿಯಂಡ್‌|

ಓಡಿಯಂಡುಳ್ಳ ಮೋಡತ್‌ರ ನಡುವೆ

ಪಳ ಪಳಂದೆಣ್ಣಿ ಮಿನ್ನಿಯಂಡ್‌|

ಪಾಲಾರ ಪೋಲೆ ನೆಲಚಿ ಬೊಳಿನುಂಡ್

ಭೂಮಿ ತಾಯಿಕ್ ತಂಪಾಯಿ|

ಕಳಿಪಳ ಮಕ್ಕಡ ಮನದುಂಬಾ ದುಂಬಿತ್

ಕುಸಿಯೋಡೆ ಅಯಿಂಗಾ ಕಳಿಪಕ್‌|

ಮೊರಡ್‌ವ ಮಕ್ಕಡ ಮೊರೆಯು ನಿಪ್ಪಕ್

ನಾನೇ ಬೋಂಡುಂದೆಣ್ಣಿಯಂಡ್‌|

ನನ್ನ ಕಾಟಿಯಂಡ್ ಪಾಟ್‌ಪಾಟಿಯಂಡ್

ನಿಪ್ಪಲ್ ವರಕ್ ಕೂಟಿಯಂಡ್‌|

ಚಂಗ್ರಾದಿಡ ಬೈಟ್ಲಾಲ್ ಮನೆಮಕ್ಕ ಎಲ್ಲಾರೂ
ಒಂದಾಯಿ ಕೂಡಿ ಪಟ್ಟಿಲ್|
ತರತರ ಕಳಿಯೂ ಕೂತ್ ತಳಿಯೂ
ಬೈಟ್ಲಾಡೀ ಪೂರಮೆ ಕಳಾಚಂಡ್|

ಕಾಲಕೊಮ್ಮೆ ಪುತ್ತರಿ ನಮ್ಮೆಕೂ
ನಾಡ ಬೊಳಿನ ಕಾತಂಡ್
'ಪೊಲಿ, ಪೊಲಿ ಕಾಕಿಯಂಡ್, ಕದ್ ಕೊಂಡ್ಪೋಪಕ'
ನಾಡ ಬೊಳಿನೇ ಕೊದ್ಚಂಡ್|

ಪದ್ನಂಜಿ ದಿನಕ್ಕೊಮ್ಮೆ ಕಾಂಬ ನನ್ನ
ಎಲ್ಲಾರೂ ತುದ್ಚಿ ಕೊದ್ಚಂಡ್
ಬಾ, ಬಾ, ಮಾಮ, ಚಂದಮಾಮ,
ನಂಗಡ ಮನೆಕ್ ನೀನೊಂದ್|



ತಾವರೆ ಪೂ

ಕೆರೆಲ್ ದುಂಬನ ನೀರ್‌ನ ನೋಟ
ನೀರ್‌ಡ ಕೇದಲ್ ಕೆತ್ತನ ನೋಟ
ಕೆತ್ತರ ನಡುಲ್‌ಂಜಿ ತಾವರೆ ಗಿಡವು
ಬೊಳಂದಿತ್ ನಿಂದ ಚಾಯಿನ ನೋಟ|

ಬೊಳತದ್, ಚೋಂದ ತಾವರೆ ಪೂವ್
ಗಿಡತಲ್ ಬೀಂದ ಚಾಯಿನ ನೋಟ|
ಪೂವ್‌ಡ ರಂಗ್‌ಕೂ, ಚಾಯಿಕೂ ಎಕ್ಕಲು
ನೀರೂ ಕೆತ್ತಯೂ ದಂಡೂ ಬೋಂಡು|

ಉದ್‌ಚಿತ್ ಬಪ್ಪ ಸೂರ್ಯಂಡ ರಶ್ಮಿ
ಮೊಗ್ಗ್‌ಡ ಮೂಡ್‌ನ ಮೆಲ್ಲೆ ತೇಂಡ್ವಕ
ಎಸಳನ್ ತೊರಂದಂಡ್ ಬೀಂದಂಡ್ ಬಪ್ಪ
ತಾವರೆ ಪೂವ್‌ಡ ಚಾಯಿನ ನೋಟ.

ಗಿಡತಾರ ಮೀದವು, ಪೂವ್‌ಡ ಮೀದವು
ಒರ್‌ತುಳಿ ನೀರ್ ಅಂಟಿಯಂಡಿಲ್ಲೆ,
ಆಚೀಂಗೂ ಬೋಂಡು, ಕೆತ್ತಯು ನೀರ್
ಗಿಡಕೂ ಪೂವ್‌ಕೂ ಬೊಳವಕ್ ನೋಟ||

ಮಕ್ಕಡ ಬದ್‌ಕ್‌ಕ್ ಎಕ್ಕಲು ಬೋಂಡು
ಅವ್ವಂಡ-ಅಪ್ಪಂಡ ತಂಪಾರ ಆಸರೆ
ಎಂದಕ ಮಾತ್ರ ನೆಮ್ಮದಿ ಕ್ಕಟ್ಟಿತ್
ಬದ್‌ಕಲು ಎಕ್ಕಲು ತಾವರೆ ಪೋಲೆ||

ಗಾಳಿಪಟ

ಪಟ ಪಟ ಪಾರ್ವ ಗಾಳಿಪಟ
ಕಾತ್‌ಕ್ ಪಾರ್ವ ಗಾಳಿಪಟ
ತರತರ ರಂಗ್‌ಡ ಗಾಳಿಪಟ
ಅಣ್ಣಯ್ಯ ಮಾಡ್‌ನ ಗಾಳಿಪಟ ||೧||

ಬಲ್ಯದ್ ಚೆರಿಯದ್ ಗಾಳಿಪಟ
ಬಾನತ್ ಪಾರ್ವ ಗಾಳಿಪಟ
ಚೆರಂಜನೆ ಕಂಬ ಗಾಳಿಪಟ
ಪಾರಿಯಂಡ್ ಕಳಿಪ ಗಾಳಿಪಟ ||೨||

ನೂಲ್ ಕೆಟ್ವನ ಗಾಳಿಪಟ
ಬಾಲಂಗೋಸಿರ ಗಾಳಿಪಟ
ಬಗ್ಗನ ಕೋಲಾರ ಗಾಳಿಪಟ
ಎತ್ತರ ಪಾರ್ವ ಗಾಳಿಪಟ ||೩||

ಮಕ್ಕಕ್ ಕಳಿಪಕ್ ಗಾಳಿಪಟ
ಕಾತ್‌ಲ್ ಪಾರ್ವ ಗಾಳಿಪಟ
ನೂಲ್‌ನ ಬಲಿಪಕ ಬಾಲ ತುಂಡಿತ್
ಭೂಮಿಕ್ ಬುದ್ಧತ್ ಗಾಳಿಪಟ.

ತಾಯವ್ವಂಡ ತೇಚ್ ಕುಳಿ

ನಂಗಡ ತಾಯಿರ ಕುಳಿಪ ಕತನ
 ಎಣ್ಣೆವಿ ನಿಂಗಕ್ ನಾನಿಕ್ಕ|
 ಕೇಪಳ ನಿಂಗಕ್ ಕೊದಿಯು ಆಕಂಡು
 'ನಂಗಳೂ ಅನ್ನನೇ ಕುಳಿಕಾಂದ್'|

ಬೈಯತ ದಿನವೇ ಗುಡ್ಡತ ಒಲೆಕ್
 ಕುಟ್ಟೆನೋ ಪುಳ್ಳಿನೋ ಬೆಚ್ಚಿತ್|
 ಕಲಕ್ ದುಂಬಾ ನೀರ್ ಕೂಟಿತ್
 ಎಲ್ಲಾ ಏರ್ಪಾಡ್ ಮಾಡಿತ್|

ನೇರತೆ ಎದ್ದಿತ್, ಒಲೆಕ್ ತಿತ್ತ್ ಟ್ವಾ
 ಒಲೆರ ಮಿಂಞಲ್ ಅಳತಂಡ್|
 ಚರಕ್‌ಲ್ ಎಣ್ಣೆಯೂ, ಪುಳಿಂಗೋಡ್ ಪೊಡಿಯು
 ಎಡ್ತಂಡ್ ಗುಡ್ಡಕ್ ಪೋಯಿತ್|

ಕೆಮಿಕ್, ಮಂಡೆಕ್, ಕೈಕಾಲ್ ಮೇಲ್‌ಕ್
 ಚಾಯೋಡೆ ಎಣ್ಣೆ ತೇಚಿತ್|
 ಒಂದರೆ ಗಂಟೆ ತಿತ್ತರ ಮಿಂಞಲ್
 ಕೈಕಾಲ್ ನಡುನೆಲ್ಲಾ ಕಾಚಿತ್|

ಕಲತುಳ್ಳ ನೀರ್ ಕೊತಕೊತ ಕಾಯಣೆ
ತಿತ್ತರ ಮಿಂಗಳಲ್ ಅಳತಂಡ್|
ಪುಳಂಗೋಡ್ ಪೊಡಿಯು, ಬೊಳ್ಳರಿ ತಾಳಿಯು
ಮೇಲ್ಕಾಕ್ ಮಂಡೆಕ್ ಇಟ್ಟುಂಡ್|

ಚಾಯೋಡೆ ಉದ್ದಿತ್, ಬಿಸಿ ಬಿಸಿ ನೀರ್
ಮಂಡೆಕ್, ಮೇಲ್ಕಾಕ್ ಬೂಕಿಯುಂಡ್|
ಒರ್ಕಲ ನೀರ್ನ ಒಬ್ಬಳೆ ಕುಳಚಂಡ್
'ಉಸ್ಸಪ್ಪಾ'ಂದೆಣ್ಣಿಯುಂಡ್ ಬಂದೀತ್|

ಬಿಸಿ ಬಿಸಿ ಕಾಫಿ ಲೋಟಕ್ ಬೂಕಿಯುಂಡ್
ಉರ್ಪಿ ಉರ್ಪಿ ಕುಡಚಂಡ್|
ಒಕ್ಕವ ಬೆವರ್ನ ಕೈಲ್ ತೇಟಿಯುಂಡ್
'ಉಸ್ಸೇಂದ್' ಊಜಲೆ ಬುಟ್ಟುಂಡ್|

ಕಾಫಿ ಕುಡಚಿತ್ ಬೆವರ್ನ ತೇಟಿಯುಂಡ್
ಇರ್ಚ್ ಕೋಂಬರೆಕ್ ಪೋಯಿತ್|
ಪದ ಪದ ಕಡಿಕೆಲ್ ಕಂಬಳಿ ಪೊತ್ತಂಡ್
ಚಾಯೋಡೆ ಬುದ್ದುಂಡ್ ವರೀತ್|

ಕೋಳಿ ಕೂತ್ಕ್ ಏವಳ ತಾಯವ್ವ
ಎಲ್ಲಾ ಕಾರ್ಬಾರ್ ನೋಟಿಯುಂಡ್|
ಮಕ್ಕಕ್ ಮರಿಕೂ, ಮೈಮಕ್ಕ ಮೋವಂಗಕು
ಕೆಲಸ ಕಾರ್ಯ ಎಣ್ಣಿಯುಂಡ್.

ಬದ್ಧಾಕನ ಚಂದ್ರ

ಚುಪ್ಪನು ಚುಪ್ಪಿಯು

ಬಿಂದಿಗೆ ಎಡ್ತಂಡ್

ಕಣತರೆಕ್ ಪೋಚಿ|

ಕೈಲಿಂಜ ಬಿಂದಿಗೆ

ನೆಲತಲ್ ಬೆಚ್ಚಿತ್

ಬಗ್ಗಿತ್ ನೋಟಾಚಿ ಕಣತರೆನಾ|

ಬೊಳಾತ ಬಾವುಡ

ಚಂದ್ರದ ನಳತನ

ದಂಡಾಳು ಕಂಡತ್ ನೀರಲ್|

'ಚಂದಮಾಮಾ ನೀರಲ್

ಮುಳಿತ್‌ಂದ್

ಚುಪ್ಪಿ ಎಣ್ಣೆ ಚಿ ಮೊರಟಂಡ್|

ಮೊರಡತೆ ಚುಪ್ಪಿ

ಚಂದಮಾಮನ

ನೀರಂಜಿ ಕೊಡಿಕ್ ನಾನೆಡ್‌ಪಿ|

ಎಣ್ಣೆ ತ್ ಚುಪ್ಪಿನ

ಸಮಾಧಾನ ಮಾಡಿತ್

ಒರ್ ಕೆಣಿ ಮಾಡ್ಚಿ ಚುಪ್ಪಣ್ಣಿ|

ಕಣತರೆ ಕೇರ್ಕ್

ಮರತಾರ ಕೊಕ್ಕೇನ

ಕೆಟ್ಟಿತ್ ಬುಟ್ಟಿತ್ ಕಣತರೆಕ್|

ತಿರ್ಗಣಿ ಕಾಟ್ಟಿತ್

ಕೊಕ್ಕೇನೊ ಕೇರ್ನೊ

ಮೆಲ್ಲೆ ಬುಟ್ಟಿತ್ ನೀರ್ಕ್|

ನೀರ್ಕ್ ಮುಟ್ಟ್ಪನ

ಕೊಕ್ಕೇನ ಕಂಡಿತ್

ಚುಪ್ಪಣ ಎಣ್ಣೆ ಚಿ ಚುಪ್ಪಿಕ್|

ಚಂದಮಾಮ

ಕೊಕ್ಕೇಲ್ ಚಿಕ್ಕಿತ್

ನಾನಿಕ್ಕ ಕೊಡಿಕ್ ಬಲಿಪಿಂಡ್|

ರಭಸತ್ ಬಲಿಪಕ

ಕೊಕ್ಕೇರ ತುದಿಯು

ಚಿಕ್ಕಿ ಚಿ ಕಲ್ಲರ ಸಿರಲೊಳ್ಕ್|

ರಭಸತೋಡೆ ಬಲಿಪಕ
 ಚಿಕ್ಕನ ಕೊಕ್ಕೆ
 ತುಂಡಿತ್ ನೀರಾಕ್ ಬುದ್ಧತ್.

ಅಯತಪ್ಪಿತ್
 ಚುಪ್ಪನು ಕೂಡ
 ಕೊಡಮರಾಂಜಿ ಬುದ್ಧತ್ ಬಯ್ಯಕ್|

ಓಡಿ ಬಂದಿತ್
 ಚುಪ್ಪಿಯು ಅವಂಡ
 ಕೈ ಪುಡಾಚಿ ಮೆಲ್ಲೆ ಎಪ್ಪಾಚಿ|

ಕುಂಡಿನ ತ್‌ಟ್ಟಿಂಡ್
 ಚುಪ್ಪಿಕ್ ಎಣ್ಣಾಚಿ
 ನೋಟೊಮ್ಮ ಕೊಡಿಕ್ ನೀನಾಂದ್|

ಬಾಣತ್‌ಲಿಂಜ
 ಚಂದ್ರನ ಕಾಟಿತ್
 ಎಣ್ಣಾಚಿ ಚುಪ್ಪ ಇನ್ನನೆ|

ಚಂದಮಾಮನ
 ಕಣತರೆಡೊಳ್‌ಂಜಿ
 ಎಡಾತ ದೇವ ನಾನಾಂದ್|

ಕಾತ್

ಕಾತ್, ಕಾತ್,

ಜೋರ್ಡ ಕಾತ್

ಸುಯ್ ಸುಯ್ ಕಾತ್

ಸುತ್ಯಂಡ್ ಬಾತ್|

ಭೂಮಿರ ಮೇಲೆ

ದೂಳಾರ ಕಾತ್, ಸುತ್ಯಂಡ್ ಬಾತ್

ಸುಯ್ ಸುಯ್ ಕಾತ್|

ಕಾತ್ ರಭಸಕ್

ದೂಳಾರ ರಾಶಿ

ಕೊಡಿಕ ಪಾರ್ಚಿ

ಸುಯ್ ಸುಯ್ ಸುತ್ಯಚಿ, ದೂಳಾರ ರಾಶಿ|

ಚಪ್ಪಲೆ ಪಾರ್ಚಿ,

ಅಪ್ಪರ ಇಪ್ಪರ|

ಎಪ್ಪರ ನೋಟ್ಟಿಕೋ

ದೂಳಾರ ರಾಶಿ|

ಬಾತ್, ಬಾತ್, ಜೋರ್ಡ ಕಾತ್, ಸುತ್ಯಂಡ್ ಬಾತ್|

ಒಣಂಗ್ ನ ಚಪ್ಪಲೆ

ಪಾರ್ಚಿ ಕೊಡಿಕ.

ಪಚ್ಚೆ ಚಪ್ಪಲೆ

ಬುದ್ಧತ್ ಭೂಮಿಕ್|

ಕಲ್ಲೆ, ಮುಳ್ಳೆ, ದೂಳೆರ ಕೂಡ,
 ಸುಯ್, ಸುಯ್ ಬಾತ್,
 ಸುತ್ತಂಡ್ ಬಾತ್|

ದೂಳೆ ದುಂಬಾಚಿ
 ಕಾತ್‌ನಗುಂಡ್|
 ಮೋಡವು ಬಾತ್
 ಬಾನತ್ ದುಂಬಾ|

ಪಟ, ಪಟ, ಮಳೆ ತುಳಿ
 ಬುದ್ಧತ್ ಭೂಮಿಕ್|
 ಕಾತ್‌ಡ ರಭಸ ತಗ್ಗಿಚಿ|
 ಭೂಮಿರ ಮೇಲ್ ತಂಪಾಚಿ|

ಕಾತ್, ಕಾತ್,
 ಜೋರ್‌ಡ ಕಾತ್|
 ಸುತ್ತಂಡ್ ಬಾತ್
 ಸುಯ್ ಸುಯ್ ಕಾತ್|



ಮೊನತ್‌ರೋ ಆಮೆಡೋ ಓಟ್‌ರ ಪಂಥ

ಆಮೆಯು ಮೊನವು

ಪಂಥ ಕೆಟ್ಟಿತು

ಒಕ್ಕಚೆ ಓಟ್‌ಕ್ ಇಳ್‌ಂಜತ್‌|

ಚುರ್‌ಕ್‌ಡ ಮೊನಕ್

ನಾನೇ ಮಿಂಞಾಂದ್

ಮನಸ್ಸಲೇ ನಂಬಿಕೆ ಇಂಜತ್‌|

ಚೆನ್ನಂಗ್ ದೂರ

ಓಡಿತ್ ಮೊನವು

ಮೆಲ್ಲೆ ತಿರೀತ್ ನೋಟ್‌ಚ್ಚಿ|

ಆಮೆನ ಕಾಂಗತೆ

ನೆಮ್ಮದಿ ಮನತ್‌ಲ್

ಧೈರ್ಯತ್ ಬುದ್ಧಂಡ್ ವರ್‌ಚಿ|

ತೆರಂಗ್ಯಂಡ್ ತೆರಂಗ್ಯಂಡ್

ಮೆಲ್ಲೆ ಬಪ್ಪಕ

ಆಮೆ ಕಂಡತ್ ಮೊನತ್‌ನಾ|

ಗೊರಕೆ ಬಲೆಚೆಂಡ್

ವರಿಯಂಡುಳ್ಳ

ಮೊನತ್‌ನ ಕಾಂಬದು ತೆಳ್‌ಚತ್‌|

ಸದ್ದೇ ಮಾಡತೆ
ತೆರಂಗ್ಯಂಡ್ ಮೆಲ್ಲೆ
ಮಿಂಞಾಕ್ ಮಿಂಞಾಕ್ ದಾಟ್ಚಿ|

ಗುರಿನ ಮುಟ್ಟಿತ್
ಮೊನತನ ಕಾತಂಡ್
ಮನಸಾಲೆ ತೆಳ್ಚೆಚಂಡ್ ಅಳತತ್|

ಎಚ್ಚಕೋ ನೇರ
ಕೈಂಜಿತಾಪದು
ವರಕಂಜಿ ಎಚ್ಚರ ಆಪದು|

ಬಯ್ಯಕ್ ತಿರಿತ್
ನೋಟ್ನ ಮೊನಕ್
ಆಮೆರ ಸುಳಿವೂ ಕಂಡಾಲೆ|

ತೆರಂಗ್ಯಂಡ್ ಬಂದಿತ್
ಇಚ್ಚಕ್ ಬೆರಿಯು|
ಆಮೆಕ್ ಎತ್ತಕ್ ಕೈಯಾಂದ್|

ಮನತಾಲೆ ಗೇನ
ಮಾಡ್ಯಂಡ್ ಮೊನವು
ಪಾರಿಯ್ಯಂಡ್ ಪಾರಿಯ್ಯಂಡ್ ಓಡ್ಚಿ|

ಗೆರೆಡ ಪಕ್ಕತ್
ಆಮೆನ ಕಂಡಿತ್
ಇಾಂಣತ್ ನಿಂದಿತ್ ನೋಟ್ಚಿ
ಮೊನತ್ತರ ಗತ್ತ ಅಡಂಗ್ಚಿ|

ಅಜ್ಜ ಮಾದಾನ ಕೆಣಿ

ತೊಪ್ಪಿದ ಕೆಟ್ಟನ ಎಡ್ತಂಡ್ ಪೊರಟತ್ ಅಜ್ಜ ಚತ್ತೆಕ್|
 ಬೆದ್ಲೆ ನಡ್ಂದಿತ್ ಕೈಯ್ಯತೆ ಆಪದು ನಿಂದತ್ ಬಟ್ಟೆಲ್|
 ಮರತ್ತರ ನಳತ್ಲೆ ಕೆಟ್ಟನ ಬೆಚ್ಚಿತ್ ತಾಂಗೀ ಅಳಾತತ್ ಮರತನ|

ಚೆನ್ನಂಗ್ ನೇರತ್ ವರಕ್ ಬಪ್ಪದು
 ಅಲ್ಲಿಯೇ ಬುದ್ಧಂಡ್ ವರಚಿ|
 ಮರತ್ತರ ಕೊಡಿಲ್ ಅಳಾತಿತಿಂಜ
 ಕೋಡಂಗ ಇದ್ನ ನೋಟಚಿ|

ಗೊರಕೆರ ಸದ್ಲೆ ಕೇಪದು ಕೋಡಂಗ
 ಮೆಲ್ಲೆ ಇಳಾಂಜತ್ ಕೋದಕ್|
 ಕೆಟ್ಟನ ಉತ್ತಿತ್ ನೋಟಕ ಕಂಡತ್
 ತರತರ ರಂಗ್ ತೊಪ್ಪತನಾ|

ಚೆರಿಯದು, ಬಲ್ಯದು, ಕರತದ್, ಬೊಳತದ್
 ಪಲ ತರತುಳ್ಳ ತೊಪ್ಪತನಾ|
 ಒಂದೊಂದೇ ಎಡ್ತಂಡ್ ಮಂಡೆಕ್ ಇಟ್ಟಂಡ್
 ಪತ್ತೆಚಿ ಮರಕ್ ಕೋಡಂಗ|

ಮರತ್ತಲೆ ಅಳಾತಂಡ್ ಅಪ್ಪರಿಪ್ಪರ
 ಚೇಷ್ಟೆ ಮಾಡಿಯಂಡ್ ಇಂಜತ್|
 ಚೇಷ್ಟೆರ ಸದ್ಲೆಕ್ ಎಚ್ಚರ ಆಪದು
 ಎದ್ದಿತ್ ಅಳಾತತ್ ಅಜ್ಜಯ್ಯ|

ಕೆಟ್ವಾರ ಒಳ್ಳೆಲ್ ತೊಪ್ಪಿಯ ಕಾಂಗತೆ
 ನೋಟಾಚಿ ಕೊಡಿಕ್ ಮರತನಾ|
 ಕೊಡಿಕ್ ನೋಟಣೆ ಕಂಡತ್ ಮರತಲ್
 ತೊಪ್ಪಿ ಇಟ್ಟು ಕೋಡಂಗಲಾ|

ಗೆನ ಮಾಡಿಯಂಡ್ ಗೇನ ಮಾಡಿಯಂಡ್
 ಮಂಡೆನ ಮಾಂದ್‌ಚಿ ಅಜ್ಜಯ್ಯ|
 ತೊಪ್ಪಿ ಬಯ್ಯಕ್ ಕೊಟ್ಟುಂಡುದಾಚೇಂಗಿ
 ಕೆಣಿಯೊಂದ್ ಮಾಡ್‌ಚಿ ಅಜ್ಜಯ್ಯ

ತಾಂಡ ಮಂಡೆರ ತೊಪ್ಪಿನ ಎಡ್‌ತಿತ್
 ರಭಸತ್ ಕನಾಚತ್ ದೂರಕ್|
 ಇದೊನ ಕಂಡಿತ್ ಕೋಡಂಗಲ್ಲಾ
 ಕಿಚ, ಕಿಚ, ಕಿಚ, ಕಿಚ ಎಣ್ಣೆಯುಂಡ್|

ಮಂಡೆಂಜಿ ತೊಪ್ಪಿನ ಎಡ್‌ತಿತ್ ಕೋಡಂಗ
 ಕನಾಚತ್ ರಭಸತ್ ಕಾದಕ್|
 ತೊಪ್ಪಿನೆಲ್ಲಾ ಎಡ್‌ತಂಡ್ ಅಜ್ಜ
 ಚುರಾಕ್‌ಲ್ ಕೆಟ್ವಾ ಕೆಟ್ವಾಚ್ಚಿ|

ನಿಪ್ಪಲ್ ಕೆಟ್ವಾನ ಬೆಚ್ಚುಂಡ್
 ಪೊರಟತ್ ಅಜ್ಜ ಚತ್ತಕ್|

ಮಡಿಕೇರಿ ದಸರಾ

ಅಜ್ಜಂಡ ಕೂಡ
ಪೂರಟಿತ್ ಪುಟ್ಟಿ
ಮಡಿಕೇರಿ ದಸರಾ ನೋಟಾವಕ್|

ಕಡಲೆ, ಚಕ್ಕುಲಿ
ಕಾರಸೇವು
ಮಿಠಾಯಿ ತಿಂದತ್ ಕುಸಿಕುಸಿಲ್|

ಕೋಟೆರೊಳ್‌ಲುಳ್ಳ
ಅನೆಯಳ ಕಾಂಬಕ
ತನ್ನ ತಾನೇ ಮರಂದತ್|

ಕಲ್ಲಾರ ಕೋಟಿನ
ಕೆಟ್ಟಾನ ಜನತ್ನನ
ಮನತ್‌ಲೆ ಕೊಂಡಾಡಿ ನಿಂದತ್|

ದೇವಡ ಲೀಲೆನ
ಪಲತರ ರೀತಿಲ್
ಕಾಟಾವ ತೇರನ ನೋಟಾಚಿ|

ಕೊಟ್ಟು ಪಾಟು
ಕೇಪದು ಪುಟ್ಟಿ
ತಾಳ ಕೂಟಿಯಂಡ್ ಆಡ್‌ಚಿ|

ಬಿಂದಿಗೆ ದೇವಳ
 ಕಾಂಬದು ಪುಟ್ಟ
 ಆಡಿಯಂಡ್ ಬಯ್ಯನ್ನೆ ಪೊರಟತ್|

ತರತರ ವೇಷ
 ಕರಡಿರ ಕಳಿಯು
 ಎಲ್ಲವೂ ಕಾಂಬಕ ಕುಸಿಯಾಚಿ|

ಬೈಟ್ಡಿ ಕುಳಾರ್ಲಾ
 ಸುತ್ತಿ ಕಳಚಂಡ್
 ಚಾಯಿರ ದಸರಾ ನೋಟಾಚಿ|

ಪ್ರಶ್ನೆರ ಮೇಲೆ
 ಪ್ರಶ್ನೆ ಕೇಟಿತ್
 ಅಜ್ಜಂಡ ಮಂಡೆನ ತಿಂದ್|

ಕಾಲಕಾಲೋದಿ
 ಆಪ ದಸರಾ
 ನೋಟಂಡು ನಾಕೊಂದ್ ಎಣ್ಣಾಚಿ|

ಮಿನ್ನಂ ಪುಳು

ಮಿನಿ ಮಿನಿ ಮಿನ್ನವ ಮಿನ್ನಂಪುಳುವೇ,
ಇರ್‌ಟತ್ ಮಿನ್ನವ ಮಿನ್ನಂಪುಳುವೇ
ಬೊಳಿನ ಕಾಟ್‌ವ ಮಿನ್ನಂಪುಳುವೇ
ರೂಪತ್ ಚೆರಿಯ ಮಿನ್ನಂಪುಳುವೆ|

ಬೊಳೆತ ಬಾವುಡ ಬೊಳಿರ ಮಿಂಞಲ್
ಮಿನಿ ಮಿನಿ ಮಿನ್ನವ ನಿನ್ನ ನೋಟಿತ್
ಲೆಕ್ಕಕೇ ಇಲ್ಲೆಂದ್ ಐಲಾಟ ಮಾಡಿತ್
ಕುಸು ಕುಸುಂದೆಣ್ಣಿತ್ ತೆಳೆಚೆಂಡ್ ನೋಟಿವ||

ಕರ್ತ ಬಾವುಡ ಇರ್‌ಟಿ ದಿನತ್‌ಲ್
ಮಿನಿ ಮಿನಿ ಮಿನ್ನಿತ್ ಬೊಳಿ ಕಾಟ್‌ಂದೆಣ್ಣಿ
ತುದ್‌ಚೆಂಡ್ ಕೊದ್‌ಚೆಂಡ್ ಬೊಳಿ ಕಾಟ್‌ಂದೆಣ್ಣಿ
ಪಲತರ ರೀತಿಲ್ ಕೊಂಡಾಡುವ ನಿನ್ನ||

ಆಕಾರತ್ ನೀನ್ ಚೆರಂಜನೆ ಕಾಂಬ್ಯ,
ಇರ್‌ಟತ್ ನೀನೇ ಬೊಳಿನ ಕಾಟ್ಟಿ,
ಕುಂಡಿರ ತುದಿಲ್ ಬೊಳಿನ ಬೆಚ್ಚೆಂಡ್
ಮಿನಿ ಮಿನಿ ಮಿನ್ನಂಡ್ ಸಹಾಯ ಮಾಡ್||

ಸ್ವರಾಕ್ಷರತ್ ಅಡಂಗೊನ ಆನೆ ಕುಟ್ಟಿ

'ಅ'ಯ್ಯೋ! ನೋಟ, ಎದೊಕೆ ಕಾಂಬ

'ಅ'ನೆಯೊಂದ್ ಬಾತ್|

'ಇ'ದೊಂದ ಚಾಯಿ ಮಂಡೆ ಕಂಡ್

'ಈ'ಶ ಕುಂಞಿ ಕ್ ಕೊಡೊತತ್|

'ಉ'ದ್ ತುಂಬಿಕ್ಕಿನ ನೇತಿ

'ಊ'ರಾಲೆಲ್ಲಾ ಸುತ್ತಾಚಿ|

'ಋ'ಕ್ಷ ಕಣ್ಣ್ ಚಾಯಿ ಕಂಡ್

'ಎ'ಲ್ಲಾ ನಿಂದ್ ನೋಟೊಚಿ|

'ಏ'ಕದಂತ ಪೆದವುಗೊಂಡ್

'ಐ'ಕೃಮತ ಕಾಟೊಚಿ|

'ಒ'ರ್ ಮಾವುತಂಡ ತಕ್ಕ್ ಕೇಟ್

'ಓ'ಡ ಕಳೊಚಿ ಬಂದಂಡ್|

'ಔ'ಂಕಿಕಾಲ್ ದೂಡಿಯಂಡ್

'ಅಂ'ಕುಶತ್ ಕುತ್ತಕ|

'ಅಂ'ಹಾ ದುಂಬ ಚಾಯಿಯುಳ್ಳ ಅನೆಕುಟ್ಟಿ ಬಾತ್‌ಂದ್|



ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ

ನಾಳಿಯಮ್ಮಂಡ ದಿ|| ಅಯ್ಯಪ್ಪಮ್ಮಯ್ಯ ಪಿಂಞ ದಿ|| ಪಾರ್ವತಿ ದಂಪತಿಯಡ ಮೂಂದನೆ ಮೋವಳಾಯಿತ್ 4-11-1943 ಲ್ ಪುಟ್ಟಾನ ಬಡಕಡಮ್ಮಂಡ ಕಸ್ತೂರಿ ಗೋವಿಂದಮ್ಮಯ್ಯ ಕನ್ನಡತ್ ಎಂ.ಎ. ಪದವಿ ಪಡ್ಂದಿತ್. ದಿ|| ಬಡಕಡಮ್ಮಂಡ ಗೋವಿಂದಮ್ಮಯ್ಯನ ಮಂಗಲಾನ ಇವು ಸುಮಾರ್ 39 ಕಾಲ ಉಪಾದ್ರಿಣಿ ಆಯಿತೂ, ಉಪನ್ಯಾಸಕಿ ಆಯಿತೂ ಚಾಕ್ರಿ ಮಾಡಿತ್ ನಿವೃತ್ತಿ ಪಡಂದಿತ್. ಹಿಂದಿಲ್ 'ವಿಶಾರದಾ' ಪರೀಕ್ಷೆ ಪಾಸ್ ಮಾಡಿತುಳ್ಳ ಇಯಂಗ ಚೆನ್ನ ಕಾಲ ಹಿಂದಿ ಉಪಾದ್ರಿಣಿ ಆಯಿತೂ ಚಾಕ್ರಿ ಮಾಡಿತ್.

ದಿನಪತ್ರಿಕೆಲೂ, ಕೊಡವ ಆಚೆ ಪತ್ರಿಕೆಲೂ ಇಯಂಗ ಎಳ್ಳೊನ ಸುಮಾರ್ ಕಥೆ, ಕವನ, ವೈಚಾರಿಕ ಎಳ್ಳೊ ಪ್ರಕಟ ಆಯಿತ್. ಅಲ್ಲತೆ, ದಸರಾ ಕವಿಗೋಷ್ಠಿ, ವಿಚಾರ ಗೋಷ್ಠಿಲೂ ಭಾಗವಹಿಸಿತುಳ್ಳ ಇಯಂಗಡ ಕವನ, ನಾಟಕ ಆಕಾಶವಾಣಿಲೂ, ದೂರದರ್ಶನತೂ ಪ್ರಸಾರ ಆಯಿತ್.

ಈಂಗ್ ಮುಪ್ಪಡೆ ಇಯಂಗ ಕೊಡವ ಭಾಷೆಲ್ ಎಳ್ಳೊನ 'ಅವ್ವನ ತುದ್ಚಿತ್' ಎಣ್ಣುವ ಕವನ ಸಂಕಲನವೂ, ಕನ್ನಡ ಭಾಷೆಲ್ ಎಳ್ಳೊನ 'ಮೊದಲ ಹೆಜ್ಜೆ' ಕವನ ಸಂಕಲನವೂ ಬೊಳಿಕೊಂಡಿತ್. ಇದ್ ಇಯಂಗಡ ಮೂಂದನೆ ಪುಸ್ತಕ.

ಇಯಂಗಡ ವಿಳಾಸ :

ಕಸ್ತೂರಿ ಗೋವಿಂದಮ್ಮಯ್ಯ

ಮನೆ ನಂ. 11 ಬಿ - 173

ಹೊಸ ಬಡಾವಣೆ, ಮಡಿಕೇರಿ

ಫೋನ್: 08272 - 228275, ಮೊ. : 9480238579